

Գլխավոր տեղեկություն

Համար	ՀՕ-225
Տիպ	Օրենք
Ակտի տիպ	Հիմնական ակտ (03.07.1998-12.01.1999)
Կարգավիճակ	Չի գործում
Սկզբնաղբյուր	ՀՀՊՏ 1998.07.03/14(47)
Ընդունող մարմին	ՀՀ Ազգային ժողով
Ընդունման ամսաթիվ	01.07.1998
Ստորագրող մարմին	ՀՀ Նախագահ
Ստորագրման ամսաթիվ	02.07.1998
Ուժի մեջ մտնելու ամսաթիվ	03.07.1998
Ուժը կորցնելու ամսաթիվ	12.01.1999

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

Օ Ր Ե Ն Ք Ը

Ընդունված է Ազգային ժողովի
կողմից
1 հուլիսի 1998 թ.

ԴԱՏԱԻՐԱՎԱԿԱՆ ԲԱՐԵՓՈԽՈՒՄՆԵՐԻ ԱՆՑՈՒՄԱՅԻՆ ԺԱՄԱՆԱԿԱԾՐՁԱՆՈՒՄ ՎՃՈՎԵԿ
ԴԱՏԱՐԱՆԻ ԳՈՐԾՈՒՆԵՈՒԹՅԱՆ ՄԱՍԻՆ

Հոդված 1. Սույն օրենքը կարգավորում է դատաիրավական բարեփոխումների անցումային ժամանակաշրջանում (օրենքն ուժի մեջ մտնելու օրվանից մինչև 1999 թվականի հունվարի 12-ը) վճռաբեկ դատարանի կազմավորման և գործունեության կարգն ու դրա հետ կապված գործող քաղաքացիական և քրեական դատավարության օրենսգրքերով սահմանված վճռաբեկ ու հսկողական վարույթների իրականացման առանձնահատկությունները:

Հոդված 2. Վճռաբեկ դատարանը կազմված է՝

- 1) վճռաբեկ դատարանի նախագահից.
- 2) քաղաքացիական և տնտեսական գործերով պալատից.
- 3) քրեական և զինվորական գործերով պալատից:

Վճռաբեկ դատարանի յուրաքանչյուր պալատ կազմված է վճռաբեկ դատարանի պալատի նախագահից և պալատի 5 դատավորից:

Հոդված 3. Մինչև 1998 թվականի հուլիսի 8-ը արդարադատության խորհուրդը, Հայաստանի Հանրապետության Սահմանադրության 95 հոդվածի 3-րդ կետին համապատասխան և «Արդարադատության խորհրդի մասին» Հայաստանի Հանրապետության օրենքի 15 հոդվածով սահմանված կարգով, Հայաստանի Հանրապետության Նախագահին առաջարկում է վճռաբեկ դատարանի, նրա պալատների նախագահների և դատավորների թեկնածությունները:

Հոդված 4. Մինչև 1998 թվականի հուլիսի 10-ը Հայաստանի Հանրապետության

Նախագահը, Հայաստանի Հանրապետության Սահմանադրության 55 հոդվածի 11-րդ կետին համապատասխան, նշանակում է վճռաբեկ դատարանի անդամներին՝ վճռաբեկ դատարանի, նրա պալատների նախագահներին ու դատավորներին:

Հոդված 5. 1998 թվականի հուլիսի 10-ից վճռաբեկ դատարանը համարվում է կազմավորված և իրականացնում է սույն օրենքով իրեն վերապահված լիազորությունները:

Հայաստանի Հանրապետության Սահմանադրության 116 հոդվածի 10-րդ կետին համապատասխան 1998 թվականի հուլիսի 10-ից դադարում են Հայաստանի Հանրապետության գերագույն դատարանի անդամների լիազորությունները:

Հոդված 6. Անցումային ժամանակաշրջանում վճռաբեկ դատարանի նախագահը՝

- 1) ապահովում է վճռաբեկ դատարանի բնականոն գործունեությունը.
- 2) հրավիրում և վարում է վճռաբեկ դատարանի լիազումար նիստը.
- 3) նշանակում է գործը լուծող վճռաբեկ դատարանի կազմը և նիստը նախագահողին.
- 4) դատավորին բացարկ հայտնելու կամ դատավորի ինքնաբացարկի դեպքում նշանակում է փոխարինող դատավոր.
- 5) իրականացնում է գործող օրենսդրությամբ Հայաստանի Հանրապետության նախկին գերագույն դատարանի նախագահին վերապահված այլ լիազորություններ:

Հոդված 7. Անցումային ժամանակաշրջանում վճռաբեկ դատարանի պալատի նախագահը՝

- 1) հրավիրում և վարում է պալատի նիստերը.
- 2) վճռաբեկ դատարանի նախագահի բացակայության դեպքում՝ վերջինիս հանձնարարությամբ, ժամանակավորապես իրականացնում է նրա լիազորությունները:

Հոդված 8. Վճռաբեկ դատարանի կազմավորման օրվանից Հայաստանի

Հանրապետության նախկին գերագույն դատարանի քաղաքացիական գործերով դատական կոլեգիայի՝ Հայաստանի Հանրապետության քաղաքացիական դատավարության օրենսգրքով սահմանված լիազորություններն իրականացնում է վճռաբեկ դատարանի քաղաքացիական և տնտեսական գործերով պալատը՝ երեք դատավորի կազմով:

Վճռաբեկ դատարանի կազմավորման օրվանից Հայաստանի Հանրապետության նախկին գերագույն դատարանի քրեական գործերով դատական կոլեգիայի և զինվորական գործերով դատական կոլեգիայի՝ Հայաստանի Հանրապետության քրեական դատավարության օրենսգրքով սահմանված լիազորություններն իրականացնում է վճռաբեկ դատարանի քրեական և զինվորական գործերով պալատը՝ երեք դատավորի կազմով:

Հոդված 9. Վճռաբեկ դատարանի կազմավորման օրվանից Հայաստանի

Հանրապետության նախկին գերագույն դատարանի նախագահության՝ Հայաստանի Հանրապետության քաղաքացիական դատավարության օրենսգրքով սահմանված լիազորություններն իրականացնում է վճռաբեկ դատարանի քաղաքացիական և տնտեսական գործերով պալատը՝ երեք դատավորի կազմով:

Տվյալ գործով չեն կարող մասնակցել վճռաբեկ դատարանի քաղաքացիական և տնտեսական գործերով պալատի այն անդամները, որոնք նախկինում մասնակցել են այդ գործի քննությանը:

Հոդված 10. Վճռաբեկ դատարանի կազմավորման օրվանից Հայաստանի

Հանրապետության նախկին գերագույն դատարանի նախագահության՝ Հայաստանի Հանրապետության քրեական դատավարության օրենսգրքով սահմանված լիազորություններն իրականացնում է վճռաբեկ դատարանի քրեական և զինվորական գործերով պալատը՝ երեք դատավորի կազմով:

Տվյալ գործով չեն կարող մասնակցել վճռաբեկ դատարանի քրեական և զինվորական գործերով պալատի այն անդամները, որոնք նախկինում մասնակցել են այդ գործի քննությանը:

Հոդված 11. Վճռաբեկ դատարանի կազմավորման օրվանից Հայաստանի

Հանրապետության նախկին գերագույն դատարանի պլենումի՝ Հայաստանի Հանրապետության քաղաքացիական և քրեական դատավարության օրենսգրքերով սահմանված լիազորություններն իրականացնում է վճռաբեկ դատարանի լիազումար նիստը:

Վճռաբեկ դատարանի լիազումար նիստին մասնակցում են վճռաբեկ դատարանի նախագահը, պալատների նախագահները և վճռաբեկ դատարանի դատավորները:

Վճռաբեկ դատարանի լիազումար նիստի միջոցով հսկողության կարգով իրականացնում է գործերի քննությունը՝ վճռաբեկ դատարանի անդամների ընդհանուր թվի առնվազն 2/3-ի կազմով:

Հոդված 12. Հայաստանի Հանրապետության գերագույն դատարանի քաղաքացիական,

քրեական և զինվորական գործերով կոլեգիաների՝ մինչև սույն օրենքի ուժի մեջ մտնելն առաջին ատյանի կարգով իրենց վարույթ ընդունած գործերը, որոնցով մինչև հուլիսի 9-ը ներառյալ չի կայացվել դատավճիռ, վճիռ կամ այլ վերջնական որոշում, Հայաստանի Հանրապետության գերագույն դատարանի նախագահի կողմից ուղարկվում են առաջին ատյանի դատարան, և գործի քննությունը վերահսկվում է:

Հոդված 13. Սույն օրենքի ուժի մեջ մտնելու պահից ուժը կորցրած ճանաչել՝

1) Հայաստանի Հանրապետության քրեական դատավարության օրենսգրքի 28 և 29 հոդվածները.

2) Հայաստանի Հանրապետության քաղաքացիական դատավարության օրենսգրքի 114 հոդվածը.

3) Հայաստանի Հանրապետության քրեական դատավարության օրենսգրքի 9 հոդվածի չորրորդ և հինգերորդ մասերը:

Հոդված 14. Հայաստանի Հանրապետության քաղաքացիական դատավարության օրենսգրքի 1 հոդվածի առաջին մասը շարադրել հետևյալ խմբագրությամբ՝

«Քաղաքացիական գործերի վարույթի կարգը Հայաստանի Հանրապետության բոլոր դատարաններում որոշվում է Հայաստանի Հանրապետության քաղաքացիական դատավարության օրենսգրքով և «Դատաիրավական բարեփոխումների անցումային ժամանակաշրջանում վճռաբեկ դատարանի գործունեության մասին» Հայաստանի Հանրապետության օրենքով: Սույն օրենսգրքի և վերոհիշյալ օրենքի միջև հակասությունների դեպքում գործում են վերջինիս նորմերը»:

Հոդված 15. Հայաստանի Հանրապետության քրեական դատավարության օրենսգրքի 1 հոդվածի առաջին մասը շարադրել հետևյալ խմբագրությամբ՝

«Հայաստանի Հանրապետության տարածքում քրեական գործերի վարույթի կարգը որոշում է Հայաստանի Հանրապետության քրեական դատավարության օրենսգրքով և «Դատաիրավական բարեփոխումների անցումային ժամանակաշրջանում վճռաբեկ դատարանի գործունեության մասին» Հայաստանի Հանրապետության օրենքով: Սույն օրենսգրքի և վերոհիշյալ օրենքի միջև հակասությունների դեպքում գործում են վերջինիս նորմերը»:

Հոդված 16. Վճռաբեկ դատարանի կազմավորումից հետո մեկշաբաթյա ժամկետում վճռաբեկ դատարանի նախագահն ստեղծում է լուծարային հանձնաժողով, որը վեցամսյա ժամկետում իրականացնում է գերագույն դատարանի լուծարման հետ կապված աշխատանքները:

Վճռաբեկ դատարանի կազմում չնշանակված՝ գերագույն դատարանի անդամների աշխատավարձը և օրենսդրությամբ սահմանված հավելավճարները պահպանվում են մինչև 1999 թվականի հունվարի 1-ը:

Հոդված 17. Վճռաբեկ դատարանն իր գործունեությունն իրականացնում է Երևան քաղաքում, նախկին գերագույն դատարանի նստավայրում (Խորհրդարանի 6):

Հոդված 18. Սույն օրենքն ուժի մեջ է մտնում պաշտոնական հրապարակման պահից և գործում է մինչև 1999 թվականի հունվարի 12-ը:

**Հայաստանի Հանրապետության
Նախագահ**

Ռ. Քոչարյան

Երևան
2 հուլիսի 1998 թ.
ՀՕ-225

Փոփոխման պատմություն

Փոփոխող ակտ

Համապատասխան ինկորպորացիան

Փոփոխված ակտ

Փոփոխող ակտ

Համապատասխան ինկորպորացիան

